


Mensahe di Premier Nelson Oduber



Mescos cu cada pueblo, nos pais tambe tin su dia nacional, unda e meta ta pa fomenta union den nos pueblo.

Tabata na 1971 cu un hoben politico, awe den feliz memoria Betico Croes a bin cu e idea pa introduci na nos pueblo e simbolonan di union y libertad.

Pa concretisa un ideal riba tereno di nos estructura estatal ta bon pa mayoria di e pueblo ta wak den e mesun direccion.

Algo cu bo ta pone henter un pueblo uni, aprecia y sinti den dje e simbolonan di libertad y identidad.

Como diputado hoben e tempo aya, esta na 1975/1976 gobierno insular a nombra dos comision pa recomenda gobierno riba nos himno y bandera, unda lo busca for di pueblo sugerencianan pa e bandera y modifica e cantica existente "Aruba Dushi Tera" cu un couplet mas, cual a bin di sr. Lio Booï.

Tabata 16 di maart 1976 cu e comisionnan nan recomendacionnan a ser presenta na Eilandsraad di nos pais y como diputado di Cultura mi mester a defende e proposicionnan.

Awe mi ta recomenda nos hobennan pa bay busca e notanan di e reunion ey, unda tabatin politiconan cu a opone sin fin e balornan spiritual aki.

Masha hopi discusion, hopi falta di respet pa nos simbolonan di union y libertad, hasta tabatin organisacionnan cu a nenga di toca e himno y hisa e bandera. Tin hasta cu a baha e bandera y trapele.

Cu tabatin doñonan di trabou, comerciantenan cu a nenga di coopera pa nan empleadonan por a participa na actividadnan riba nos dia nacional.

E temponan ey no tabata regla pa ley cu oficialmente dia 18 di maart ta liber, pasobra tabata 15 di december, Statuutdag, ta un dia liber.

Nos al final a cambia e ley, unda ta kita 15 di december y ta pone na su lugar nos dia nacional, esta 18 di maart.

Cu aña e aceptacion a bira mas grandi y cu awe e ta total bou di henter nos pueblo.

Dia 18 di maart 1976 pueblo a hiza su bandera y toca su himno pa promer vez den un Wilhelmina Stadion completamente yen.

Danki na e miembronan di e comisionnan, esnan cu a manda proposicionnan, na awe den feliz memoria Betico Croes y tur cu a sostene nos bou circunstancianan dificil cu nos por a celebra nos dia nacional.

Awe riba nos dia nacional laga nos reflexiona riba nos democracia, nos desaroyo y nos balornan spiritual grandi, manera respet, fatsoen, moral y decencia.

Ariba 18 di maart, nos dia nacional, ta bon pa nos para un rato keto riba nos estado di derecho, nos institutonan y nos democracia.

Nos libertadnan constitucional ta funciona debidamente y hasta nos por bisa cu hopi vez mal uzo ta ser haci di dje, unda tin hende ta sconde bou di anonimidad pa caba cu hende cu nan no ta gusta.

Na Aruba nos ta e pais cu pa cabez di pueblo conoce mas radio, corant y hasta television. Tur tin cu bende nan productonan pa sobrevivi y ta logra.

Un di nos dificultadnan ta cu tin hende cu kier informa pueblo, mientras nan mes no ta bon informa, locual ta un condicion pa ta un bon periodista.

Hopi di nos politiconan cu a caba di sali di 7 aña di gobierno, unda nan por a haci y cumpli cu cos bon nan pa pueblo, awor cu instigacion, engaño, intimidacion kier agita e mesun pueblo cu 7 aña nan a negligia pa stroba progreso di nos pais.

Tur gremio den nos comunidad cu diripiente ta menasa gobierno autentico, democrático, legitimo, cu tin ora nan no haña nan gana, nan kier pone Aruba plat.

Nos ta e unico pais na mundo unda tin sindicato kier pone nan pais plat pa para hunto cu comercio, pasobra gobierno kier su 'fair share' y belasting a bira transparente.

Ariba e dia di awe laga nos juventud reflecciona riba nan estudio, nan futuro y kico nan tambe kier haci pa nos pais.

Nos grandinan mester haña e atencion debido como muestra di aprecio pa nan contribucion na desaroyo di nos pais.

Esnan destructivo, negativo den oposicion corda un cos, cu mañan bo mes por ta gobierno di e pais y stop di opone cosnan cu sea abo of nos den gobierno mester ser haci na sirbi interes general.

Nos ta gradici nos Creador pa duna nos un Libertador di taya, manera awe den feliz memoria Betico Croes.

Danki na dje y tur cu a lucha hunto cu ne, nos por tin awe un dia nacional pa celebra. El a fomenta orguyo propio bou di nos hendenan.

Laga e dia di awe ta un di fiesta nacional, hisa bo bandera, canta bo himno y ser un bon Arubiano. Respet a nos leynan y juda coregi tur locual no ta bon.

Biba nos himno, bandera, ortografia, nos identidad y biba nos pais Aruba.

Cu Dios Todopoderoso protega nos tur tanto den tempo bon como den tempo dificil.

Nelson O. Oduber
Minister President
Aruba, 15 di maart 2004